

إِنَّ الدِّينَ عِنْدَ اللَّهِ الْإِسْلَامُ



لَا إِلَهَ إِلَّا اللَّهُ مُحَمَّدٌ رَّسُولُ اللَّهِ

Khutba Jummah

HADHRAT MUHYI-UD-DIN AL-KHALIFATULLAH

Munir Ahmad Azim

31 Août 2018
(19 Dhul-Hijjah 1439 AH)

Après ki li fine salué tous so bane disciples (et tous bane Musulmans) entier le monde avec le Salaam - la Salutation de paix dans l'islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor : « **La Patience, Persévérance et L'Endurance** ».

Pou ki li réussir établi dans so l'âme bane zoli qualités, couma la patience, la persévérance, l'endurance, ene musulman bizin à tout prix ena recours à bane différents versets Quran Shareef et à bane Hadiths ki explicites lors sa sujet là. En vérité, Quran Shareef donne nous bane l'exemples claires ki faire nous réfléchi, afin pou donne nous l'énergie et le courage pour prend sa chemin là et pou réussi. Sans la patience, persévérance et l'endurance, ene croyant pas pou réussi ouvert li-même intérieurement, spirituellement vers la compréhension de la religion – en l'occurrence, l'islam – et de l'essence de la foi en li-même.

Nous *Rab*, Allah (swt) dire nous dans Quran Shareef :

« **Donne sa bon nouvelle là à bane ki ena patience, bane ki, kan ene malheur tombe lor zot, dire simplement : 'Nous appartenir à Allah et c'est vers Li ki nous pou bizin retourner.'** Lors sa kalité dimoune là, Bondié (Allah) envoie So bénédiction et So grâce, et c'est zot ki suivre le bon chemin. » (Al-Baqara 2 : 156-158).

« Ô ou ki ena la foi, montrer patience, supporter avec patience, tini ferme et suivre chemin Allah, afin ki ou prospérer. » (Al-Imran 3 : 201).

« Nous pou accorde à bane ki endurer zot récompense, d'après pli bon action ki zot ti faire. » (An-Nahl 16 : 97).

« Toi, montrer patience, et to patience pou vine de Allah seul. » (An-Nahl 16 : 128).

« Supporte avec patience tout saki tombe lors toi. C'est sa résolution pou prend dans tout saki to faire. » (Luqman 31 : 18).

« Nous ti nomme bane dirigeants parmi zot, ki ti guide zot par Nous l'ordre. Zot ti patient alors, et zot ti gagne la foi ferme dans Nous signes. » (Al-Sajda 32 : 25).

« Bane ki ena patience, pou gagne zot récompense en entier, sans compter! » (Az-Zumar 39 : 11).

Sa c'est quelques versets béni ki trouve dans Quran Shareef ki Allah (swt) fine faire déssane pour l'humanité pour tout lé temps. Zot démontré ki, là kot ena la patience et l'endurance, alors péna aucaine doute ki pou ena le succès ki pou sourcer de par sa patience là. À sa deux éléments ki forme le caractère de l'homme, nous bizin ajoute aussi certainement la foi et la piété pou complète li (sa croyant là). C'est à ce moment là ki la bénédiction divine pou tomber. Parski Allah (swt) rappelle à l'*Oummah* à travers bane versets Quran la valeur de la patience et de l'endurance.

En effet, parmi bane vertus ki constituer la parure d'ene musulman, ena la patience et l'endurance. Sa deux éléments là, kan adopté zot avec conviction, zot aide à combatte pour l'amour d'Allah bane inconvénients ki bane les autres causer. La patience li tout simplement la contrainte de l'âme pou accepter saki répugne li et pou supporter avec impassibilité, avec constance le mal ki arrive li.

Dans bane épreuves, bane musulmans et surtout mo bane disciples du Jamaat Ul Sahih Al Islam bizin contenir zot et persévérer dans l'accomplissement de bane bons actions et vine bane modèles de vertus. En aucaine cas, faudé pas zot paniquer ou zot irriter et faudé pas aussi zot en colère. Au contraire, zot bizin ena ene confiance complète dans Allah. Rappelle zot ki bane difficultés ki zot pé vive zot nek bane épreuves ki zot bizin surpasser pour l'amour d'Allah. Tout sa c'est bane épreuves, bane testes, bane l'examen ki Allah faire zot passer pou ki faire ressortir zot vrai valeur et zot vraie la foi.

Rappelle zot ki bane mauvais manières zot tout simplement bane mals ki vini après ki ene mauvais l'événement, ene mauvais situation fine passé. Zot bizin reste loin de tout bane mal ki pou capave écarte zot avec Allah. Rappelle zot ki zot mission c'est ki zot bizin rapproche zot avec Allah, et pou rassembler bane dimounes dans le chemin d'Allah afin ki zot recevoir zot aussi bane mêmes bénédictions divines ki zot fine recevoir.

Saki fine passé, fine fini passé. C'est dans le passé. Zot bizin astaire bâtir zot l'avenir lors bane bases solides, et renforci zot lien avec Allah. Et pour sa, la patience et l'endurance dans bane moments difficiles li extrêmement nécessaire. Réfléchi alors à ene l'avenir sain et spirituel, kot pas ena aucaine mauvais kitchose ki pou affecter ou la santé physique, mentale, et spirituel, kot zot soumette zot et place zot confiance complètement dans Allah, ou Créateur parski c'est dans sa soumission là ki ena ou salut.

Zot bizin garde à l'esprit ki la colère pas résoude nannié. Au contraire, la situation vine pli grave avec la colère, et bien souvent le croyant perdi patience et l'espoir. Alors, zot bizin retenir zot-même sans réserve. Tout saki arrive l'être humain ici-bas li seulement temporaire. Sa li nek ene teste ki zot bizin passer afin ki zot réussi gagne zot laissez-passer pour l'au-delà (*Aakhérat*). Si ou laisse ou emporter dans la colère et ou laisse ou-même rentre dans bane pièges de bane mals de sa lé monde là, sa li pou ene affront ki ou pé faire avec Allah (swt). Faudé pas zot désespérer. Le désespoir apporte zis l'angoisses et ene manque de confiance dans Allah (swt). Quelle que soit l'épreuve ki touche ene dimoune, surtout ene musulman, li bizin faire li-même le devoir pou trouve so réconfort dans le souvenir d'Allah (swt) – *Zikrullah* – et gagne la conviction pure et pieuse ki c'est ALLAH, ZIS ALLAH ki pou capave accorde li saki li pé désirer. Pas ena ene meilleur l'exemple de patience d'ene dimoune/humain ki dans zistoire de Hazrat Ayub (as), le prophète Job. En effet, la vie de sa prophète d'Allah (swt) là li tout simplement ene modèle pour l'humanité en entier.

L'épreuve de Hazrat Ayub (as) ti duré dix huit ans (18 ans) à travers bane maladies bien graves et ki difficiles à supporter. Face à n'importe ki épreuve, le réconfort d'ene musulman vine de so rapprochement avec Allah (swt). C'est vers Li (Allah) ki nous bizin tourner pour cherche l'aide, confort, soulagement, patience, l'endurance, bien-être. Quel que soit le problème, pas ena ene l'autre solution ki demande le Créateur pou aide ou. Et meilleure façon c'est pou sacrifier ou-mêmes kot ou mette ou devant Li, spécialement pendant *Salat-ul-Tahajjud*, kot li ene moment de tranquillité, de sérénité, de solitude, et ene rendez-vous des plus bénis avec ou Créateur. C'est le meilleur moment pou ki ou cause avec ou *Rab* et pou cherche

auprès de Li tout refuge. Et ou faire sa tout en prosternant ou-même devant Li et en déversant tout ou la peine ou bien ou bane tracas devant Li. Et ou faire sa tout en livrant aussi devant Li tout ou la joie et ou bane l'espairs concernant ou l'avenir lors sa la terre là et dans l'au-delà aussi. C'est ene moment spécial kot ou capave consacrer ou pou glorifier, pou faire louanges d'Allah.

« **Cherche l'aide (Allah) dans l'endurance (la patience) et la prière.** » (Al-Baqara 2 : 46, 154).

D'après bane versets 46 et 154 de Surah Al-Baqara de Quran Shareef, fine fini établi ki la persévérance, la patience et l'endurance faire partie de bane devoirs du cœur. Sa bane éléments là zot considérés couma bane initiateurs pou cale l'âme et pou force li pou supporter saki oppose à so bane penchants ou pou délaisse so bane plaisirs. Sa trois valeurs humains là capave classifié en différents façons :

1. **La patience** : Nous prend patience kot nous reste loin de saki Allah fine interdit nous.
2. **L'endurance** : Nous endure tous bane difficultés et bane épreuves ki vine lor nous chemin.
3. **La persévérance** : Kot nous persévérer dans mette en pratique tout saki Allah fine faire obligatoire pou nous.

Nous bien-aimé Prophète, Hazrat Muhammad (saws) fine dire :

« *Celui ki oulé vine chaste, Allah pou aide li. Celui ki rode vine indépendant sans l'aide dimounes, Allah pou enrichi li (pou fer li réussi dans so démarche). Celui ki oulé prend patience, Allah pou vine à so secours. Et personne pas gagne ene cadeau ki pli meilleur et fécond (enrichissant) ki la patience.* » (Bukhari, Muslim).

« *Tous bane zaffaires ki arrive ene croyant li merveilleux parski ena le bien dans sak zaffaire ki li entreprendre, et ça pas arriver pou personne excepter dans le cas d'ene croyant : Si li arriver ressenti ene contentement, li remercier Allah et c'est ene bien pour li ; si li malheureux (li dans problème), li montrer la résignation (et endure saki arrive li avec patience), et sa li bénéfique pour li.* » (Muslim).

La valeur spirituelle de sa trois éléments clés ki forme le caractère d'ene musulman :

1. **Persévérer** : Kot sa veut dire ki ou force ou l'âme pou applique bane obligations religieuse ki Allah fine ordonné, par exemple : pou conner kan pou fer *Namaz (Salat)* dans bane l'heure fixé et kan faudé pas fer *Namaz*, ki mois ki

fine fixer pou ou garde *Roza (Sawm)*, c.-à-d., carême ki obligatoire, et aussi, entre autres, le mois ki fine fixé pour le Hajj.

2. **Prend Patience** : Kot sa veut dire pou empêche ou l'âme pou commette saki Allah fine interdit. Sa nécessite ene très gros z'effort pour contraindre ou l'âme et pou retenir li pou commette bane kitchoses ki fine interdits. Par exemple : Faire paresse et reste loin avec bane *Salat*, rode tous prétexte pou pas garde *Roza* pendant Ramadan, trouve bane excuses pour pas paye *Zakat*, consomme l'alcool, rentre dans le cercle et vine addicte avec bane jeux du hasard, parmi tant d'autres. Alors, prend patience veut dire, ki ou bizin reste fidèle à ou la foi tout au long de ou la vie pour l'amour d'Allah malgré bane montagnes de difficultés et d'épreuves et ki ene croyant bizin ena confiance dans Allah dans saki Allah fine décrété pour li.
3. **L'Endurance** : Ene croyant bizin conne endure bane difficultés vis-à-vis de saki dérange so l'âme, tel ki : la souffrance, le mal, bane difficultés de toutes sortes, la tristesse à cause de bane problèmes, ene *Mayyat* (décès), entre autres. Li bizin penser à tout moment ki la vie lors sa la terre là li en vérité nek ene l'endroit, ene foyer de bane épreuves et difficultés et kot c'est ene l'endroit kot li bizin passe par bane épreuves et c'est ene l'endroit kot li bizin conne travail bien, c'est-à-dire, faire bane bons actions, tandis ki *Aakhérat* li la caze, l'endroit kot li pou gagne récompense de tous so bane z'effort ki li fine faire lor la terre, ou sois li pou gagne punition pou bane mals ki li fine faire lors la terre. *Aakhérat* pou être ene règlement de compte pou li.

Ki Allah aide sakaine d'entre nous pou vine bane modèles de patience, de persévérance et d'endurance pou So plaisir. Plus nous pou montrer nous patient et endurant dans tous bane situations de la vie, en séki concerne nous la vie matériel et spirituel, plus nous pou récolter l'aide, le plaisir et l'amour d'Allah. Allah tester nous et c'est à nous pou réussi passe le teste de la foi. Li nous devoir pou faire Allah, nous Allah fier de nous, fier de So bane créatures ki Li content d'ene l'amour infini. *Insha-Allah, Ameen.*